

Rregullore

“Mbi Proçedurat dhe Kriteret për Emërimin e Korrespondentëve në Shqipëri”

Në përputhje me Rregulloren e Brendshme dhe legjislacionin e aplikueshëm në territorin shqiptar për sigurimin/risigurimin dhe TPL-në e detyrueshme, Byroja Shqiptare e Sigurimit ka parashikuar kriteret për emërimin e korrespondentëve lidhur me aksidentet motorike të ndodhura në Shqipëri.

Neni 1 Qëllimi

Kjo rregullore ka për qëllim të parashikojë rregullat, kushtet dhe kriteret, bazuar në të cilat Byroja Shqiptare e Sigurimit miraton, refuzon ose shfuqizon emërimin e korrespondentëve të themeluar në vendin për të cilin është kompetente, të cilët trajtojnë kërkesat për dëmshpërblim që rrjedhin nga aksidentet e shkaktuara nga mjetet për të cilat siguruesi ose siguruesit në fjalë kanë lëshuar një policë sigurimi dhe që ndodhin në territorin shqiptar.

Neni 2 Përkufizime

“Korrespondent” do të quhet çdo sigurues ose person juridik i emëruar nga një ose më shumë sigurues, me miratimin e Byrosë së vendit ku është themeluar, me qëllimin për të trajtuar kërkesat për dëmshpërblim që rrjedhin nga aksidentet e shkaktuara nga mjetet për të cilat siguruesi ose siguruesit në fjalë kanë lëshuar një policë sigurimi dhe që ndodhin në territorin shqiptar.

Neni 3 Entet që mund të veprojnë si Korrespondent

Korrespondent mund të jetë:

- Një shoqëri sigurimi që përmbush kriteret ligjore në përputhje me Ligjin Nr. 9267 “Mbi Shoqëritë e Sigurimit dhe Risigurimit”, Ligjin Nr. 10076, datë 12.02.2009 “Mbi Sigurimin e Detyrueshëm në Sektorin e Transportit”, dhe që është Anëtare e Byrosë Shqiptare të Sigurimit dhe e autorizuar për të lëshuar policën e detyrueshme të përgjegjësisë ndaj palëve të treta (TPL).
- Një ent ligjor, i liçencuar nga Autoriteti i Mbikëqyrjes Financiare për trajtimin e dëmeve si Trajtues Dëmsh
- Një ent/person juridik që ka lidhur një marrëveshje fronting me një shoqëri sigurimi anëtare të Byrosë Shqiptare të Sigurimit, për të trajtuar dëme në emër të saj.

Neni 4 Proçedura për Emërimin e një Korrespondenti

Vetëm Byroja do të ketë autoritetin, me kërkesë të njerit prej anëtarëve të saj, që t’i dërgojë Byrosë Shqiptare të Sigurimit një kërkesë për miratimin e një korrespondenti të themeluar në Shqipëri. Kërkesa mund të dërgohet me faks ose email.

Aplikimi duhet të shoqërohet me një dokument që deklaron se korrespondenti i propozuar bie dakord me emërimin e kërkuar.

Byroja Shqiptare e Sigurimit do të miratojë ose refuzojë emërimin brenda tre muajve nga data e marrjes së kërkesës për emërim nga Byroja përkatëse, anëtar i të cilës është siguruesi kërkuar.

Byroja Shqiptare e Sigurimit duhet t'i komunikojë vendimin e saj dhe datën e hyrjes në fuqi të këtij vendimi Byrosë që ka bërë kërkesën për emërim si dhe korrespondentit përkatës.

Në qoftë se Byroja Shqiptare e Sigurimit nuk kthen përgjigje brënda afatit të përcaktuar, miratimi i emërimit do të konsiderohet i mirëqënë dhe data e hyrjes në fuqi do të konsiderohet mbarimi i afatit të periudhës tre mujore.

Neni 5

Kriteret për Emërimin e një Korrespondenti

Korrespondenti duhet të veprojë sipas dispozitave të Nenit 3 të kësaj Rregulloreje dhe në përputhje me rregullat dhe dispozitat e Rregullores së Brendshme të Këshillit të Byrove, dispozitat e ligjit shqiptar mbi sigurimin e detyrueshëm në sektorin e transportit, si dhe çdo legjislacioni tjetër të aplikueshëm në Shqipëri.

Neni 6

Të drejtat dhe detyrimet e Korrespondentit të Emëruar

1. Korrespondenti do të trajtojë të gjitha kërkesat për dëmshpërblim konform çdo akti apo dispozite ligjore të aplikueshme në Shqipëri lidhur me përgjegjësinë dhe kompensimin e palëve të dëmtuara dhe sigurimin e detyrueshëm motorik, në emër të Byrosë Shqiptare të Sigurimit dhe në interes të Siguruesit që ka kërkuar emërimin, për aksidentet që ndodhin në Shqipëri që përfshijnë mjetet e siguruar nga Siguruesi që ka kërkuar emërimin e tij si korrespondent.

2. Korrespondenti është i lirë të bjerë dakord me Siguruesin që ka kërkuar emërimin e tij lidhur me kushtet e rimbursimit të shumave paguar palëve të dëmtuara dhe metoden e llogaritjes së tarifës së trajtimit, në përputhje me Rregullorën e Brendshme.

3. Kur një Byro e huaj merr informacionin se një nga anëtarët e saj ka vendosur të ndërpresë marrëveshjen me një korrespondent, ajo duhet të informojë menjëherë Byronë Shqiptare të Sigurimit. Kjo e fundit gëzon të drejtën për të përcaktuar datën në të cilën miratimi i saj shfuqizohet.

4. Kur Byroja Shqiptare e Sigurimit ka dhënë miratimin për emërimin e një korrespondenti dhe vendos ta shfuqizojë atë ose merr informacion se korrespondenti përkatës dëshiron që t'i shfuqizohet miratimi i emërimit, ajo duhet të njoftojë menjëherë Byronë që ka bërë kërkesën për miratim të emërimit të korrespondentit në fjalë dhe gjithashtu t'i bëjë me dije kësaj të fundit datën kur miratimi i emërimit shfuqizohet.

5. Korrespondenti duhet t'i raportojë periodikisht në mënyrë analitike dhe sintetike (çdo tre muaj e detyrueshme) Byrosë Shqiptare të Sigurimit, lidhur me dëmet e paguara dhe në proces trajtimi, si dhe sa herë kjo e fundit paraqet kërkesën për një informacion të tillë.

6. Korrespondenti duhet të informojë menjëherë (afati maksimal një javë kalendarike nga data e marrjes së kërkesës për informacion nga BSHS) Byronë Shqiptare të Sigurimit, lidhur me procesin e trajtimit dhe pagesës së çdo kërkesë për dëmshpërblim, për të cilën është paraqitur nja ankesë pranë Byrosë Shqiptare të Sigurimit.

Neni 7 Të drejtat dhe detyrimet e Byrosë

Byroja Shqiptare e Sigurimit ka të drejtë të monitorojë dhe mbikqyrë trajtimin dhe pagesat e dëmeve.

Byroja Shqiptare e Sigurimit është ekskluzivisht kompetente për të trajtuar dhe paguar kërkesat për dëmshpërblim në emër të Byrosë dhe për interes të Siguruesit që ka kërkuar miratimin e saj për emërim korrespondenti. BSHS duhet të informojë palën/t e dëmtuara lidhur me këtë kompetencë të saj dhe t'i përcjellë korrespondentit çdo informacion lidhur me rastin në fjalë.

Megjithatë, Byroja Shqiptare e Sigurimit, në çdo kohë dhe pa qënë e detyruar të justifikojë vendimin e saj, mund t'i heqë të drejtën korrespondentit për të trajtuar një kërkesë për dëmshpërblim dhe t'a trajtojë vetë rastin në fjalë.

BSHS, sapo të marrë njoftimin për një aksident motorik, informon dhe i dërgon dokumentat përkatëse korrespondentit për të vazhduar me procedurat e mëtejshme të trajtimit dhe pagesës së dëmit.

Çdo marrëveshje e lidhur midis korrespondentit dhe siguruesit që ka kërkuar emërimin e tij nuk është e detyrueshme për Byronë Shqiptare të Sigurimit.

Byroja Shqiptare e Sigurimit, sapo të marrë një ankesë nga palët e treta, kërkon informacion të detajuar nga korrespondenti lidhur me trajtimin e dëmit përkatës, në përputhje me Rregulloren e Brendshme të Këshillit të Byrove dhe Ligjin kombëtar mbi sigurimin e detyrueshëm në sektorin e transportit.

Neni 8 Shfuqizimi i Emërimit

Byroja Shqiptare e Sigurimit shfuqizon emërimin e një korrespondenti të miratuar më parë në rastin kur:

- Korrespondenti nuk ka zbatuar kriteret e përcaktuara në Nenin 3 të kësaj Rregulloreje;
- Korrespondenti nuk ka zbatuar dispozitat ligjore të Rregullores së Brendshme, Ligjit kombëtar mbi sigurimin e detyrueshëm në sektorin e transportit dhe çdo legjislacioni tjetër përkatës mbi sigurimet;
- Korrespondenti kërkon me dëshirën e tij shfuqizimin e emërimit;
- Shfuqizimi kërkohet nga Siguruesi që ka kërkuar emërimin e korrespondentit ose Byroja, anëtar i të cilës është ky sigurues;

-Në rastin kur Siguruesit që ka kërkuar emërimin e korrespondentit i është pezulluar ose i është shfuqizuar autorizimi për të lëshuar TPL-në e detyrueshme, ose i është hequr licenca për të trajtuar dhe paguar dëme nga Autoriteti i Mbikëqyrjes Financiare.

Neni 9 Dispozita të Veçanta

Në rastin kur një korrespondenti të emëruar i shfuqizohet emërimi, dosjet e dëmeve që kanë qënë në proces trajtimi, janë paguar, ose janë arkivuar nga korrespondenti deri në momentin e shfuqizimit, duhet të vazhdojnë të trajtohen deri në fund nga Korrespondenti në fjalë, dhe në rast rihapjeje apo një kërkesë të re për dëmshpërblim lidhur me këto raste, dosja duhet të trajtohet po nga ky korrespondent deri në përfundimin e procedurës së trajtimit dhe pagesës së dëmit.

Kërkesat për dëmshpërblim lidhur me aksidentet e ndodhura pas datës së shfuqizimit të emërimit të korrespondentit do të trajtohen nga Byroja Shqiptare e Sigurimit, në rastin kur nuk është emëruar një korrespondent tjetër .

Dispozitat e Rregullores së Brendshme të Këshillit të Byrove aplikohen automatikisht për çdo Nen të parashikuar në këtë Rregullore.

Neni 10 Dispozita Kalimtare

Shoqëritë e sigurimit që veprojnë si korrespondentë të emëruar do të rikonfirmohen për pozicionin e tyre si korrespondentë dhe do të njoftohen përkatësisht.

Entët e tjera që veprojnë si korrespondentë të emëruar do të rikonfirmohen për pozicionin e tyre si korrespondentë kur veprimtaria e tyre të jetë në përputhje me Nenin 3 të kësaj Rregulloreje dhe do të njoftohen përkatësisht. Limiti kohor që do t'u jepet për të zbatuar dispozitat e kësaj Rregulloreje të re do të jetë 6 (gjashtë muaj) nga data e miratimit të saj.

Neni 11 Mospërputhja me Rregulloren e Brendshme të Këshillit të Byrove

Në rast se dispozitat e kësaj rregulloreje janë në kundërshtim me Rregulloren e Brendshme, do të aplikohet Rregullorja e Brendshme e Këshillit të Byrove.

Neni 12 Data e hyrjes në fuqi

Kjo Rregullore hyn në fuqi një dite pas miratimit të saj nga Asambleja e Përgjithshme e Anëtarëve të Byrosë Shqiptare të Sigurimit.